

山陰縣志

錢塘勞宗發錫山甫重修

邑人王今遠用聊甫編輯

墓誌表

太學生聶鑑墓誌銘

濟南

李攀龍

提學副使

公名鑑以茹字其先長子人也蓋曾大父士誠始遷曲周
爲大父文以高年起民間賜爵一級父景岩爲郡功曹時
則生公也公爲兒時嘗問母郭氏卽兒年及母母笑若哉
曰是時爾將以蘂裡掩我地下矣公卽號泣終日不嬉戲

也弱冠以貲入爲太學生蓋兄事唐山馬健弟畜渭南李文進之屬相與抵掌言天下事矣識者以謂卽以茹疆仕何國家不可爲也及被徵詣京師則又見今所謂賢者皆可爲羞矣卑疵熾趣以得人情憐憐焉猶日懼以冒干罪咎無不包藏機心狙伺事會此非夫色厲而內荏者耶吾卽何異於鹿豕又安能效騏驥蹄促驥下乎將仗尺箠以範我馳驅也是豈其意哉初豈願以其貲賈禍也輒歸不復語仕進矣公性好施予卽母外孫趙氏者母襁褓之功也亦嘗以謂公曰此其田二百畝趙氏何憂孤乎公生參

治丙辰六月二十日於嘉靖癸丑閏三月六日卒男子三人女子三人以卒之年九月二十七日葬曲周之楊固原以余觀於以茹山居耕田而得食不資羽儀矣起而爲吏身諛佞者寵利行不恤鄙夫身爲汚辱哉用居上爲右試官又恐比周賔正爲姦觸大罪怨及朋友諛佞安可爲也念爲婞直奉法不阿動忤衆枉行危而毀成婞直安可爲也是則以茹哉銘曰君子之屯以保其身有孚於哲人兮

山西左布政秦公吉士墓誌銘

邑人

陳于陞

尚書

方伯秦公輓卒兄員外君蘭坡走書陳子曰惟君與余弟

爲筆硯交相善也墓中石敢以爲托嗟乎余於方伯昆弟
同里友生惟是子輿子桑之誼敦以白首而化者固先偃
然嗚乎其能以不文辭公名吉士字曰子敬蘭臺號也贈

翁諱瀛母周宜人生員外及公公生十歲而贈翁卒員外
甫弱冠公成童髮未束也出就塾能體太宜人意兄弟刻

苦共相切劘居久之領辛酉鄉薦甲子員外君亦舉孝廉

次歲兄弟與計偕而公遂登進士第初授寧陽知縣考績

治平第一徵爲吏部主事部使者薦牘曰流移復業逋賦

一清傳絕炊爨良實也仕銓政五年歷員外

晉郎中乙亥叅湖廣政戊寅按察山西庚辰轉本省右布政未任晉左布政山西爲京師右膏雲中雁門北近邊俗勁而窳風土寒民保聚畜牧任俠喜爭而河東上黨則古冀州也有唐魏之遺纖嗇精心計好沒於財皆梗樸稱難治公之秉臬也詳愼平允積獄無留牘爲布政餉軍鉅萬刻期辦而民不驚於是公卿間稱其能方蒸蒸嚮用而公卽於庚辰歲丁太宜人艱去官矣公旣歸時局一更同官齟齬竟坐廢是時公兄員外君亦以掛誤待辯事直後兼馳抵里舍期與公傾吐肺腑謝謗者而公已於前一夕患

疽卒辛巳八月二十九日也距生之歲得年五十子女各
一人公賦性溫克恬淡若處女居常恂恂無以異於人及
臨盤錯當大故內斷之心發謀決策勞繁立就緒揮霍酬
應沛乎有餘而公私利害之交卓有以自守視歆側傾倚
態如糞土義形於色屹不可奪卒以是違於時不獲竟其
用惜哉銘曰方伯之卒也陳子往哭之值兄員外歸之次
日悲語陳子曰胡余弟舍余速乎陳子以天數譬解且曰
蘭臺公在家思孝在國思忠恭儉純粹溫克其容神歸於
嶽箕尾在天稽理察數事有固然惟鳥有鳳曰獸有麟間

世一出豈伊近人景星慶雲倏散倏合合而表瑞散歸唐
莫謂麟不永謂鳳爲天何玩狎夫景慶而辱星雲於蓬蒿
耶員外頷之曰唯唯遂納諸曠中

武德兵備霍公允猷墓誌銘

邑人

路振飛

都御史御

公諱允猷字入白世居曲之孝固村大父維蓋進士官泗
川憲副父問知庠生不仕生二子其長公也公性穎異玉
立秀拔衣冠整肅不妄言笑博涉羣書尤嗜左氏春秋下
筆千言立就方其幼時時以大器目矣弱冠試童子冠
其曹已酉舉於鄉丙辰成進士授戶部主事丁外艱服闋

補前職尋陞山西司郎中督薊州糧儲當是時遼左軍方
譁而逆璫用事諸當事懾服受指噤不能自立薊城故多
闇黨糧儲爲佯利地緣刺者多前司儲聽囑稽出納軍以
不聊公嚴絕之餉散率以時高下出入之弊肅然卒忤璫
六年不調官久之轉兗州守公以積與時違辭養母不赴
戊辰母宜人故居喪如禮有靈芝之祥自是愈絕仕進意
矣公素酒豪有步兵嗜旣居閒益頽然放杯酌閒日輒飲
飲輒醉醉卽擊唾壺歌老驥伏櫪句已而臥臥復醒醒復
飲飲復醉率以爲常客有至者卽投轄泥飲或掀髯橫襟

談天下事如指掌識者謂公非酒之人紅友白波有托而
逃是其心未嘗一日忘經世也甲戌起武德兵備而公已
病矣匝月卽告休家居又二年遂卒距生萬曆元年壽六
十有五公性友愛好施予弟允宜早喪遺孤幼公割己田
千六百畝贍之歲貢劉生謁選乏貲公爲助金就其事急
罔不周貸無不諾久而囊不繼人因有觖望者益以見公
高也銘曰氣骨巖嶙品琳琅材高用違施未彰亢志非隱
酒非狂龍蟠蠖屈潛其光漳水之許恒山陽松楸拔翠鶴
回翔霞蒸虹燦子孫昌我詞勒珉與俱長

封中書王公體健墓誌銘

崑山 徐乾學 學士

清有先生捐館之兩年將以日月葬於某里之原而先生
子余同年生鄰鄖請余銘其墓中石余於先生分猶子其
奚敢辭按狀先生諱體健字廣生號清有世爲曲周人父
介戊午孝廉歷官東平守先生生而端慤沉靜早歲嗜學
年十五遊於庠試輒高等爲文規摩古大家不屑屑時趨
有幹濟才明季兵荒畿南時苦抄掠先生言於李令堰水
繞城以備寇擾或以爲難先生慷慨力任卒成之又請以
保伍法布勒市中見寇至隨方追擊皆迸散不致圍城國

初棄諸生益肆力於詩古文辭更留意性命之學與永年
申鳧盟趙秋水鷄澤殷伯巖同邑劉津逮爲文酒之會遠
近望之以爲香山洛社焉孫徵君鍾元講學於輝縣之夏
峰先生羸糧往從請執弟子禮時先生年已六十三矣徵
君謂先生耆德碩望當以齒序先生遜謝不敢居卒就北
面之列受教惟謹由是深造闢奧所得益精作蘇門遊草
以紀其事是年徵君卒先生復身往會葬往返數百里不
敢以衰倦自逸也先生居家以勤儉自飭二子旣貴苦言
切戒以爲志得願奢則費廣而取不以道人怨天譴胥由

此起丁巳伯子除太平令將行跪請教先生曰爲令無他
道但當時時辦歸計俾可以朝罷而夕行斯善矣伯子謹
受教比考最竟爲循良第一辛酉蕩平覃慶封徵仕郎內
閣中書舍人乙丑十月年七十有三卒於家著有讀騷齋
詩賦文策畧續史懷各集行世子男三鄰郎邳鄰郎予同
榜上邳邑諸生也嘗慨師道不立愚者安於冥頑不知道
心之可貴或有志於學矣往往域於卑近又不幸與不如
己者處侈然自適而遂忘其不足也浸假而老將至矣求
如先生之命駕從師不以老自息務得乎吾心之所安而

後止豈易得哉夫而後知衛武公抑戒之詩趙宣子視莒
之語其度量相越固不可以常情測矣系以銘銘曰其心
猷然日孳孳行年六十身從師如何其望見之若大路然
豈遠而雙璧趾美令問貽千載考德敬吾詩

蕪湖知縣王公楨墓誌銘

長洲

韓

葵

禮部
尚書

宸楓王公令蕪湖古鳩茲地兩浙大都會民多四方雜處
商估輻輳狡獪隱現號稱難治公至而百爲俱舉決疑獄
馴旗丁革陋規清盜原勸農治水明倫課士捐俸贖婦瘵
疾備旱再年而頌聲滿道路蓋合能吏廉吏爲一身可謂

雄俊偉幹卓犖非常者矣惜乎五年而歸歸十年而竟卒
孤涵煩懷狀而請銘於余余維公於余爲鄰父母公之政
績在鄰者口碑未泐也奚重余銘乃按狀而竊歎公之不
可不銘云公之太翁中憲公郇雨王父則侍御純伯簪纓
世胄也中憲公登仕籍十有八載而公以十二歲童子從
父宦至壯而竟持其父喪以歸其初仕則蠻烟瘴雨之福
泉也風土違和僕從疫死中憲公亦染病數月稱藥量水
盡出公手弱冠中憲遷池陽瀕江聚萑苻公晨昏助藥則
焉及其再遷而之饒州也則其地險其時危而中憲公以

1
病以歿矣。嘗聞之。方思在剝床外有疆圉之責。
內懷百口之憂。赤紱而往。素旒而歸。含氣之倫。同爲腸斷。
而公卒支拄無恙。嗟乎。豈易及哉。今夫貴游公子。外倚門
第。內擁金錢。敗閑怙勢。以爲害於世者。未可一一數降。而
至於棄縹緲。騁嗜欲。粉白黛綠。薌澤宴笑。醴肥傾歡。蠅虱
緣臙脰。喜怒好惡。起倉卒。聲音狗馬。日易其娛。殆亦世家
之繩墨矣。一旦憑藉先業。驟邀祿位。取美錦而學製之。而
蕩情昏氣。沓泄鹵莽。以折其鼎足。此其爲害不少。毫髮異
而公獨以再傳華胄之身。磨礪於三十載艱難之會。以成

不世出之良吏則公之能自振拔是以家紹聞而國父母也夫辨賢闡幽務舉其大以鼓後學風有位余職也余不銘公誰當銘公者公諱楨字宸楓中憲公第三子生於順治乙酉卒於康熙庚辰得年五十有六子二長涵焜次涵頰卽懷狀乞銘者也銘曰胄之華不柔其骨宰之卑不吝其德百爾貴介永以爲則

崇信知縣王公庭蘭墓誌銘

閬中

李先枝

庶吉士

畿輔故燕趙宇爲士鄧林多恢魁奇傑彥顧碩犖高騫而軌準矩墨樹名績可著見時亦難之旣獲讀王君今遠所

爲其尊甫鶴洲公狀屬銘於余因竊太息謂間氣不常鍾
全德之兼殆於公覲也按狀公諱庭蘭字謝佳號曰鶴洲
世爲廣郡之曲周人父曰均廡公卽進士雷州守清惠爲
名臣子三人長卽公也器方以大十五爲生徒後八歲丙
子膺鄉舉亡何均廡公以宗伯大夫守雷陽道遠置家累
去公經厝有方井井如條理母陳恭人相樂也明年則走
一棹往省層嵐瘴雨中弔蒼梧泛洞庭鳥盤雲棧鯉浪鯨
濤探南海而窺湘衡吞山川壯氣者八九居頃之奉均廡
公遄里越三祀兩大人相繼塲益鍵戶擷四部奧足不踰